

Leesstuk 1 graad 4

Lank, lank gelede is 'n babaseun gebore. Hy was die seun van die trotse ouers, mnr. en mev. Sontonga. Hulle het hom Enoch genoem. Hulle het tot die Mpinga-stam behoort en het Xhosa gepraat.

Toe Enoch groot was, het hy 'n onderwyser geword. Hy was baie lief vir musiek en was ook lief daarvoor om kinders te leer. Hy het dikwels in sy klas gestaan en die kinders dopgehou, terwyl hulle buite gedans, gesing en gespeel het. Terwyl hy die kinders dopgehou het, het hy gewens dat al die kinders van Suid-Afrika eendag so saam kan speel, saam kan woon en vriende kan wees.

Enoch het baie liedjies geskryf, maar sy gunstelingliedjies was daardie wat hy vir die kinders geskryf het om te sing. Al sy liedjies het oor liefde en vrede gegaan.

Eendag het Enoch 'n baie spesiale liedjie geskryf. Die eerste woorde van hierdie lied was "Nkosi Sikelel' iAfrika". Dit beteken "God seën Afrika". Enoch het dikwels gebed en gevra dat die kinders van Suid-Afrika geseën moet word.

Enoch se liedjie, "Nkosi Sikelel' iAfrika", het baie bekend geword. 'n Bekende Xhosa-digter, Samuel Mqhayi, het nog woorde vir die liedjie geskryf en vandag is al die mense van Suid-Afrika baie trots wanneer hulle die liedjie sing.

Ja, die liedjie wat as " 'n Gebed vir Afrika" bedoel was, het as ons geliefde Volkslied bekend geword.